

## ADDENDA AO CONVENIO DE COLABORACIÓN ENTRE A CONSELLERÍA DE EDUCACIÓN, CIENCIA, UNIVERSIDADES E FORMACIÓN PROFESIONAL E AS UNIVERSIDADES DA CORUÑA, SANTIAGO DE COMPOSTELA E VIGO PARA O DESENVOLVEMENTO E EXECUCIÓN DE MICROCREDENCIAIS, NO MARCO DO COMPOÑENTE 21, INVESTIMENTO 6 DO PLAN DE RECUPERACIÓN, TRANSFORMACIÓN E RESILIENCIA FINANCIADO POLA UNIÓN EUROPEA-NEXT GENERATION EU

En Santiago de Compostela, na data da sinatura electrónica

### COMPARECEN

D. Román Rodríguez González, conselleiro de Educación, Ciencia, Universidades e Formación Profesional, que actúa en virtude das facultades atribuídas no artigo 34 da Lei 1/1983, do 22 de febreiro, reguladora da Xunta e da súa Presidencia, de acordo co seu nomeamento polo Decreto 44/2024, do 14 de abril, e no uso das atribucións que lle confiren os Decretos 42/2024, do 14 de abril, polo que se establece a estrutura orgánica da Xunta de Galicia e 138/2024, do 20 de maio, polo que se establece a estrutura orgánica da Consellería de Educación, Ciencia, Universidades e Formación Profesional.

D. Ricardo José Cao Abad, reitor da Universidade da Coruña, en nome e representación dela e en virtude do nomeamento efectuado segundo o Decreto 1/2024, do 11 de xaneiro, no exercicio das competencias que lle outorga o artigo 50 da Lei orgánica 2/2023, do 22 de marzo, do Sistema Universitario, e o artigo 36.1.f) dos Estatutos desta universidade aprobados polo Decreto 101/2004, do 13 de maio, da Xunta de Galicia e modificados polo Decreto 194/2007, do 11 de outubro.

D. Antonio López Díaz, reitor da Universidade de Santiago de Compostela, en nome e representación dela en virtude do nomeamento efectuado segundo o Decreto 35/2022, do 17 de marzo, no exercicio das competencias que lle outorga o artigo 50 da Lei orgánica 2/2023, do 22 de marzo, do Sistema Universitario, e o artigo 85 dos Estatutos desta universidade aprobados polo Decreto 14/2014.

D. Manuel Joaquín Reigosa Roger, reitor da Universidade de Vigo, en nome e representación dela en virtude do nomeamento efectuado segundo o Decreto 110/2022, do 9 xuño, no exercicio das competencias que lle outorga o artigo 50 da Lei orgánica 2/2023, do 22 de marzo, do Sistema Universitario, e o artigo 29 dos Estatutos desta universidade, aprobados polo Decreto 13/2019, do 24 de xaneiro.

As partes recoñécense mutuamente plena lexitimación, capacidade e representación para a sinatura do presente convenio e, a estes efectos



## EXPOÑEN

**PRIMEIRO.** O 2 de maio de 2025 asinouse o Convenio de colaboración entre a Consellería de Educación, Ciencia, Universidades e Formación Profesional e as universidades da Coruña, Santiago de Compostela e Vigo para o desenvolvemento e execución de microcredenciais, no marco do compoñente 21, investimento 6 do Plan de Recuperación, Transformación e Resiliencia financiado pola Unión Europea-Next Generation EU.

**SEGUNDO.** O obxecto do convenio é establecer as condicións para o desenvolvemento e execución do *Plan para o desenvolvemento de microcredenciais universitarias* polas universidades públicas do Sistema universitario de Galicia que implica a emisión dun total de 3.179 microcredenciais para persoas adultas, a través de 53 accións formativas diferentes, sendo a data límite para o cumprimento do mesmo o segundo trimestre de 2026.

**TERCEIRO.** O importe total destinado ao plan na Comunidade Autónoma de Galicia, 2.649.216 euros, foi ingresado polo Ministerio de Ciencia, Innovación e Universidades na conta xeral do Tesouro da Xunta de Galicia o 5 de xaneiro de 2024, imputándose á Consellería de Educación, Ciencia, Universidades e Formación Profesional que achegará a dita cantidade con cargo a aplicación orzamentaria 07.02.422C.444.7 *Microcredenciais universitarias*, dos orzamentos xerais da Comunidade Autónoma de Galicia para o financiamento do obxecto do convenio.

**CUARTO.** O 15 de xullo de 2025 reuniuse a comisión de seguimento establecida na cláusula décimo quinta do convenio. Nesta xuntanza, logo da análise pormenorizada do executado ata o momento e, constatada a necesidade de adaptación dos prazos de xustificación ao avance real da execución, adoptouse o acordo de modificar os ditos prazos, sen que en ningún caso supoña un transvase de fondos entre as diferentes liñas de actuación, nin no número total de microcredenciais, nin na contía total prevista para cada unha das universidades.

**QUINTO.** Consonte ao disposto no artigo 17.4 da Lei 9/2007, do 13 de xuño, de subvencións de Galicia, toda alteración das condicións tidas en conta para a concesión da subvención poderá dar lugar á modificación do convenio.

Polo anterior exposto, e tal como se sinala na cláusula cuarta da parte expositiva desta addenda, acéptase a proposta de modificación dos prazos de xustificación realizada polas universidades da Coruña, Santiago de Compostela e Vigo e, dado que isto non supón incremento de gasto, por acordo das partes decídese modificar o convenio.

Por outra banda, de conformidade co disposto no artigo 31.4 da Lei 14/2013, do 26 de



decembro, de racionalización do sector público autonómico, os convenios subscritos pola Administración xeral da Comunidade Autónoma e as entidades instrumentais do sector público autonómico poderán ser obxecto de modificación cando teñan como finalidade o logro dos obxectivos de estabilidade orzamentaria e sustentabilidade financeira. Ditas modificacións terán por obxecto a redución do volume das obrigas ou a ampliación do seu prazo de execución.

Por conseguinte, as partes abaixo asinantes acordan subscribir a presente addenda ao convenio asinado, que se rexerá polas seguintes

## CLÁUSULAS

### PRIMEIRA. Modificación do convenio

**Un.** Modifícase o punto 2 da cláusula quinta do convenio asinado o 2 de maio de 2025, quedando redactada como segue:

*2. O pagamento do importe total financiado, 2.649.216 euros realizarase do xeito seguinte:*

*- Un pagamento anticipado do 100% do crédito da anualidade correspondente a 2025, 1.854.000 euros, no momento da sinatura do convenio.*

*- Un segundo pagamento do crédito da anualidade do 2026, 795.216 euros.*

**Dous.** Modifícase o punto 2 da cláusula undécima do convenio asinado o 2 de maio de 2025, quedando redactada como segue:

*2- A documentación anterior deberase presentar perante a Secretaría Xeral de Universidades, xunto coa xustificación do gasto realizado e efectivamente pagado entre o 1 de xaneiro de 2025 e 30 de xuño de 2026, na data límite do 31 de agosto de 2026.*

### SEGUNDA. Condicións

A sinatura desta addenda non afecta á distribución dos fondos entre as distintas liñas de actuación, nin ao número total de microcredenciais. Así mesmo, mantense a contía total de 2.649.216 euros do convenio e a súa distribución entre as tres universidades.



Esta addenda rexerase polas condicións estipuladas no convenio do que trae causa, formando parte integrante del.

A presente addenda réxese en canto a súa interpretación e desenvolvemento polo ordenamento xurídico administrativo, con expresa submisión das partes á xurisdición contencioso-administrativa, nos termos que se establecen no artigo 47 e seguintes da Lei 40/2015, do 1 de outubro, de réxime xurídico do sector público.

E en proba de conformidade, asinan electronicamente o presente convenio, na data indicada na marxe.

Román Rodríguez González

Conselleiro de Educación, Ciencia, Universidades e Formación Profesional

Ricardo José Cao Abad

Reitor da Universidade da Coruña

Antonio López Díaz

Reitor da Universidade de Santiago de Compostela

Manuel Joaquín Reigosa Roger

Reitor da Universidade de Vigo

